

瘍

醫

大

全

瘍醫大全目錄

卷四十

奇病部

奇病門治法

附寒門秘法

瘍醫大全卷四十

蕪湖顧世澄練江氏纂輯

增錢之栢東陽

全校

男 柳燮用和

奇病部

古今奇病附寒門秘法俱彙於此部中以便檢閱

治

奇病門治法

張仲景曰生蛇腹中以身上辨之身必乾澀如柴似有鱗甲者蛇毒也最易辨惟白芷一味爲丸每日米湯送下五錢卽全愈

人有腹中生蛇者乃毒氣化成也或感山嵐水溢之氣或感四時不正之氣或感尸氣病氣而成也方名誅毒丹用雄黃一兩生甘草二兩白芷五錢端午日修合爲末粽子米和丸桐子大飯前食之食後必作痛用力忍之切勿飲水一飲水則不效矣

華真君曰人手上皮上現蛇形一條痛不可忍此乃蛇乘人之睡而作交感於人身乃生此怪病服湯藥不效以刀刺之出血如墨汁外用白芷末摻之二次之少愈明日又刺血如前又以白芷末摻之二次化去其形先刺頭後刺尾不宜亂刺也

人有胃脘不時作痛過饑更甚尤畏大寒日日作痛予以大蒜三兩搗汁灌之忽吐蛇一條長三尺而愈蓋蛇最畏蒜氣此一奇症也

人有背上忽然痛疼裂開一縫攢出蛇一條長二尺

者頗善跳躍仲景先生親手治之而驗其症必先
背脊疼甚而又無腫塊久則腫矣長有一尺許一
條直似立在脊上乃用刀輕輕破其皮而蛇忽跳
出其人驚絕用人參一兩附子一錢半夏天南星
各三錢治之忽甦生肌散敷其患處而愈予問其
故而背忽痛耶彼人云我至一廟見塑一女娘甚
覺美麗非常偶興雲雨之思頓起背脊之痛今三
月以來痛不可忍若有蛇鑽毒刺光景予心疑似
生怪物見其人又健旺故用刺開皮肉不意蛇出

而人竟死也予隨用三生飲救之而愈可立醫案
以見病之奇而神聖之不可貌玩也

人有臍口忽長出二寸似蛇尾狀而又非蛇不痛不
癢此乃祟症也然亦因任帶之脉痰氣壅滯遂結
成此異病也人世之間忽生此病必有難喻之灾
蓋人身而現龜蛇之象其家必然敗落而時運亦
未必興隆也法當用礪砂冰片麝香各一分兒茶
二錢白芷雄黃各一錢研細末將其尾刺出血必
然昏暈欲死急以藥點之立刻化爲黑水急用白

芷三錢煎服自愈倘不愈則聽之不可再治蓋妖
旺非藥能去非前世之冤家卽今生之妖孽也

人身忽長鱗甲於腹間脇上此症婦女居多而男子
亦間生焉蓋孽龍多化人與婦人交卽成此症而
男子與龍合亦間生鱗甲也此病速治爲妙少遲
則人必變爲龍矣今傳一方用雷丸大黃白礬鐵
衣雄黃各三錢研細棗肉爲丸凡得此病用酒送
下三錢立時便下如人精者一碗胸中便覺開爽
再服三錢則鱗甲盡落矣此方之妙妙在無毒不

散而龍又最惡雄黃故相濟而成功又何疑哉况
各藥又皆去毒去水之品此方之最神最奇者也
如人先遍體發癢以錐刺之少已再癢以刀割之快
甚少頃又癢甚以刀割之覺疼必流血不已再癢
以石灰止之則血止而癢作又以刀割之又流血
又以石灰止之止之又癢勢必割至體無完膚而
後止此乃冤鬼索命之報也無法可救 岐天師
憫恤世人不知作惡誤犯者亦有之特定救割全
生湯救之方用人參一兩當歸三兩荆芥三錢水

煎服貧人無力買參以黃芪二兩代之服三劑必效而癰止痛亦平但須對 天盟誓萬勿作犯法之事有寃讐者爲之懺經禮佛庶幾不再發否則發之再不能有法救矣

人有生鳥鵲於頭上臂上外有皮一層包之或如瘤狀或不如瘤而皮膚高起一塊者內作鳥鵲之聲逢天明則啼逢陰雨則叫逢饑寒則痛疼百藥不效此乃不敬 神聖而戲弄之也必須用刀割破其皮則鳥鵲難以藏形乃破孔而出宛似鳥鵲但

無羽毛耳鳥鵲出孔之後以生肌散敷之外用神

膏

方載癰疽門

三日後依然生合此病

岐天師見之

數次

扁鵲之治

華陀之醫皆

岐天師之教

人有心窩外忽然生瘡如碗大變成數口能作人聲
叫喊此乃憂鬱不舒而祟憑之也方用金銀花生
甘草各三兩人參五錢茯神白礬各三錢水煎服
卽安靜不鳴矣再用二劑卽愈蓋甘草消毒人參
茯神以安其心白礬以止其鳴金銀花以解其火
熱故易於奏功也

如人無故見鬼如三頭六臂者或如金甲神或如斷
手無頭死鬼或黑或白或青或紅之狀皆奇病也
然此皆心虛而祟憑之用石室秘丹主之方用白
朮蒼朮各三兩半夏大戟山茨菇各一兩天南星
三錢附子一錢共爲細末加麝香一錢做成餅子
如玉樞丹一樣此方更妙於紫金錠凡遇前病用
一餅薑湯化開服之必吐頑痰碗許自愈

人腰間忽長一條肉痕如帶圍至臍間不痛不癢久
之飲食少進氣血枯槁此乃腎經與帶脉不和又

過於房事盡情縱送乃生此疾久之帶脉氣衰血
亦漸耗顏色黯然雖無大病而病實篤也法當大
補腎水而兼補帶脉自然身壯而形消方用減痕
丹熟地山萸肉各一觔杜仲山藥各半觔白朮一
觔白芍六兩白朮肉炒破故紙當歸車前子各三
兩共爲末蜜丸每日早晚各服一兩十日後覺腰
輕再服十日其肉淺淡再服全消不須兩料也然
必須忌房事三月否則無效此方乃純補腎經而
少兼任帶脉也任帶之病而用任帶之藥何愁不

建功哉

人腹中忽有應聲蟲有用殺蟲祛痰熱藥寒藥治之
俱不應然則終何以治之哉古人有將本草讀之
而蟲不應聲者用之卽愈今 岐天師別有一神
奇法治之省閱本草之勞神用生甘草一味入白
礬各等分不須二錢飲下卽愈蓋應聲蟲非蟲也
乃臟中毒氣有祟以憑之也用甘草以消毒用白
礬以消痰况二物一仁一勇又以智用之智仁勇
三者俱全崇不覺低首而却走矣

凡山魃木客狐狸虫蛇作祟憑身者用生桐油搽其
下身不便處最妙或以本人褲子包頭則妖自大
笑而去永不復犯蓋妖原欲盜人之精氣然最喜
清潔見人汚物包頭則其人之不潔可知故棄之
而去亦因其好潔而亂之也不成器之物而睡夢
中來壓人者亦以此法治之

腹中生鱉乃飲食饑飽之時過於多食一時不能消
化乃生鱉甲之虫似鱉而非鱉也亦用誅毒丹以
馬尿一碗童便半合飲之即消雄黃乃殺蛇之藥

白芷乃爛蛇之品甘草乃去毒之劑而馬尿乃化
驚之聖藥也故用之隨手而效耳此則奇病而用
奇藥也

如有腹中高大宛似坐胎形容憔悴面目瘦黃骨乾
毛枯此乃鬼胎也方用紅花半觔大黃五錢雷丸
三錢水煎服傾盆瀉出血塊如雞肝者數百片而
愈後乃用六君子湯調治之自然復原此等之病
乃婦人淫心忽起有物以憑之纔生此症無論室
女出嫁之人生此病者邪之所湊其氣必虛現又

起淫心有不邪以親邪者平方中妙在用紅花爲
君又用至半觔則血行難止有躍躍自動之貌又
加以大黃走而不守之味則雷丸蕩邪之物自然
功成之速也

如有頭角生瘡當日卽頭重如山第二日卽變青紫
第三日青至身上卽死此乃毒氣攻心而死也此
病多得之好吞春藥蓋春藥之類不過一丸食之
卽強陽善戰非用大熱之藥何能致此世間大熱
之藥無不過陽起石附子二味俱有大毒且陽起

石必經火煨而後入藥是燥乾之極自然尅我津液况窮工極巧博婦女之歡筋骸氣血俱動久戰之後必大洩盡歡水去而火益熾矣久久貪歡必然結成大毒火氣炎上所以多發在頭角太陽之部位也初起之時若頭重如山便是此惡症速以金銀花一觔煎湯飲之數十碗可少解其毒可保性命之不亡而終不能免其瘡口之潰爛也再用金銀花玄參各三兩當歸二兩生甘草一兩煎湯日用一劑七日仍服瘡口始能收斂而愈此種病

世間最多而人最不肯戒用春方痛哉如腳大指生疽亦多不救治法全此

人忽頭面腫如斗大看人小如三寸飲食不思呻吟如睡此痰也用瓜蒂散吐之而頭目之腫消又吐之而見人如故矣後用六君子湯水煎服三劑全愈此亦崇憑之也

人有中心悶甚面赤不能飲食此得之食鯉有垂在胸中也以加味瓜蒂散治之方用人參半夏甘草各三錢黃連陳皮各一錢瓜蒂七個吐之吐盡數

升皆赤頭而尾如魚須斷酒色否則三年後必飽
滿而死

張仲景曰有人大腿腫痛堅硬如石疼苦異常欲以
繩繫足高懸梁上其疼乃止放下疼卽如斫腿中
大响一聲前腫卽移大醫之上腫如巴斗不可着
席將布兜之懸掛其疼乃可此亦崇憑之也方用
生甘草一兩白芍三兩水煎服蓋生甘草專瀉毒
氣白芍平肝木以止痛也痛止則腫可消毒出則
崇可杜也正宗孽病門亦有此症

人遍身生疣瘡或內如核塊或外似蘑菇香葷木耳之狀者乃濕熱而生也數年之後必然破孔出血而死當先用外藥洗之然後用湯藥消之則愈浴洗方用蒼耳子草一觔荆芥苦參白芷各三兩水一大鍋煎湯傾在浴盆內外用席圍而遮之熱則薰溫則洗洗至水冷而止三日後乃用煎方名紅黃霹靂散人參薏苡仁各一兩白朮芡實各五錢茵陳白芥子半夏澤瀉黃芩各三錢附子一錢水煎服十劑自然全消無踪矣外邊亦無不消也

張仲景曰有人脚板下忽生二指痛不可忍者乃濕熱之氣結成觸犯神祇之故方用消指散明砂一分人參一錢冰片三分瓦葱一兩爲末以刀輕刺出血刺在生出指上卽時出水敷星星在血流之處隨出隨摻以血盡爲度流三日不流水矣而痛亦少止再用化水湯薏苡仁一兩白朮五錢人參生甘草牛膝川草薺白芥子各三錢半夏一錢水煎服四劑全愈而指盡化爲水矣外用岐天師膏藥加生肌散敷之卽愈矣

凡皮膚手足之間如蚯蚓唱歌者乃水濕生虫也方
用蚯蚓糞水調敷患處厚一寸可也其鳴卽止再
用煎湯薏苡仁芡實各一兩白朮五錢生甘草三
錢黃芩二錢附子三分防風五分水煎服卽愈此
治濕則虫無以養况又以生甘草解毒化虫防風
去風而逐瘀附子斬關而搗邪所以奏功如神也
人手掌忽高起一寸不痛不癢此乃陽明經之火不
散而鬱於手也論理該痛癢而今不痛癢不特火
鬱於腠理而且水壅於皮毛也法當用外藥消之

蓋陽明之火盛必然作渴引飲不休今又不渴是
胃中之火盡消而流毒於掌中必其人陽明之火
盛手按於床蓆之上作意行房過於用力使掌上
之氣血不行久而突突而高也不痛不癢乃成死
肉矣方用附子一個煎湯以手漬之至涼而止如
是者十日必然作痛再漬必然作癢又漬而高者
平矣蓋附子大熱之物無經不入雖用外漬無不
內入者也倘以附子作湯飲之則週身俱熱又引
動胃火掌肉不消而內症蜂起子所以外治而愈

也或附子湯中再加輕粉一分引入骨髓更效

人脚板中色紅如火不可落地又非痰毒終歲經年
不愈此病乃用熱藥立而行房火聚於脚心而不
散故經歲經年不愈也法當用內藥消之若作外
治必然爛去脚板宜用祛火湯熟地三兩麥冬玄
參沙參釵斛各一兩山萸肉茯苓甘菊花各五錢
丹皮牛膝車前子澤瀉各三錢車前二錢水煎服
十劑消二十劑全愈然須戒房事三月否則必發
發則死矣慎之哉

人有手足脫下而人仍不死之症此乃傷寒之時口渴過飲涼水以救一時之渴孰知水停腹內不能一時分消遂至四肢受病氣血不行久而手足先爛手指與腳指墮落或腳指脫落之後又爛腳板久之連腳板一齊墮落矣若有傷寒口渴過飲涼水者愈後倘手足指出水者急用岐天師之方可救指節腳板之墮落也方用薏苡仁三兩白朮一兩茯苓二兩車前子五錢肉桂一錢水煎服一連十劑小便大利而手脚不出水矣永無後患不

必多服

人有手指甲盡行脫下不痛不癢此乃腎經火虛又
於行房之後以涼水洗手遂成此病方用六味地
黃湯加柴胡白芍骨碎補治之而愈

人有指縫流血不止有虫如蟬蛻之小鑽出少頃卽
能飛去此症乃濕熱生虫也然何故生虫而能飛
耶蓋不止濕熱而又帶風邪也凡虫感風者俱有
羽翼能飛安得人身得風之氣轉不能飛也方用
黃芪薏仁熟地各五錢當歸白芍茯苓白朮甘草

各三錢人參柴胡荆芥川芎各一錢水煎服此方
之妙全不去殺虫而但補其氣血而佐之去濕去
風人身氣血和自不生虫補氣血之和則虫自無
藏身之窟况又逐水消風虫更從何處生活耶此
方之所以平而奇也服四劑則血不流而虫不出
再服四劑手指完好如初矣

人有脚肚之上忽長一大肉塊如瘤非瘤如肉非肉
按之痛欲死此乃脾經濕氣結成此塊而中又帶
火邪故手不可按按而痛欲死也法當峻補脾氣

而分消其濕爲是然而外長怪狀若在內一時消
之恐不易得當用內外夾攻之法自然手到病除
內服消濕化怪湯白米芡實薏仁各一兩澤瀉五
錢人參茯苓車前子白芥子白礬草薺各三錢牛
膝半夏陳皮各二錢水煎服二劑後用蚯蚓糞炒
一兩黃柏炒五錢兒茶三錢水銀一錢冰片麝香
各五分礪砂一分共研至不見水銀爲度將末醋
調膏敷患處一日卽全消矣極有神效此膏凡有
塊者以此內外治之無不效應如響

人自覺腸胃癢而無處抓搔者祇覺置身無地此乃火鬱結而不散之故法當用表散之藥宜化癢湯柴胡黑山梔天花粉各三錢白芍一兩甘草二錢水煎服卽愈

人糞從小便出小便從大便出者此夏天暑熱之症醫以五苓散治之亦妙今止用車前子三兩煎湯三碗一氣服完卽愈

人有小便中溺五色之石未溺之前痛甚已溺之後少覺寬快此卽石淋也交感之後入水或入水之

後交感皆有此症宜消石丹方用熟地山萸肉澤
瀉各三兩茯苓薏仁麥冬車前子各五兩骨碎補
二兩芡實八兩青鹽一兩肉桂三錢共爲末蜜丸
早晚白滾湯吞下各一兩十日必無溺石之苦矣
此症成之最苦欲溺而不溺而又欲溺尿管中痛
如刀割用盡氣力止溺一塊其聲錚然見水不化
乃膀胱之火熬煎而成此異病也其色或紅或白
或黃或青或黑不一總皆水鬱而火煎之也此方
之妙全不去治石淋而轉去補腎水之不足水足

而火自消火消而水自化其中有與妙之旨也倘
治膀胱則氣不能出而又何以化水哉

以上詳載石室秘錄

目睛忽垂至鼻如黑角塞痛不可忍或時時大便血
出作痛名曰肝脹用羌活一味煎汁服數盞自愈
夏子益奇疾方

徐之才曰眼見空中有五色物此色慾過多太虛所
致當以補藥飲之

入門

入門云眼中視物皆倒植此必因酒吐時上焦反覆
致倒瞻府故視物皆倒法用瓜蒂藜蘆復吐以正

其膽入門

得效云寒熱不止經日後四肢堅如石以物擊之一
似鐘磬聲日漸瘦弱吳茱萸木香等分煎服自愈
又云手十指節斷壞惟有筋連無節肉出如燈心
長數尺餘遍身綠色名曰血餘赤茯苓胡黃連煎
服

又云四肢節脫但有皮連不能舉動名曰筋解用酒
浸黃蘆三兩經一宿焙乾爲末每二錢酒調下

又云人自覺其形作兩人並臥不辨真假不語問亦

無對乃是離魂辰砂人參白茯苓濃煎湯服重者
氣爽假者化也

大腸頭出名曰截腸初截寸餘者可治若腸盡出不
治用藤油盛於器醫坐上飲天麻子汁數升愈

虱出怪病臨臥渾身虱出血肉俱壞每夕漸多痛癢
難言且舌尖出血身齒俱黑唇動鼻開但飲塩醋
湯半月卽安

奇疾方

筋肉化虫有虫如蠅走於皮下作聲如兒啼急用雄
黃雷丸一兩爲末搽猪肉上炙熟喫盡自愈

奇疾方

破腸症乃腹破腸出鼻穢急以香油摸腸用手送入
煎人參枸杞淋之皮自合矣喫羊腎粥十日卽愈
奇疾方

乳懸婦人產後兩乳伸長細小如腸垂過小腹痛不
可忍名曰乳懸將川芎當歸各二觔以半觔剉末
瓦器水煎不拘時服仍餘觔半到大塊用香爐慢
火逐漸燒烟安病人面前桌下要烟氣不絕令伏
桌上將口鼻及病乳常吸烟氣如藥盡未痊如前
法煎服及燒烟燠吸必安如用兩料已盡兩乳雖

縮上而不復舊用冷水磨草蘇子一粒於頭頂心
塗之片時後洗去則全安矣 奇疾方

發斑怪症有人眼赤鼻張大喘渾身出斑毛髮如銅
乃熱毒結於下焦也用白礬滑石各一兩爲末作

一服水三碗煎半不住服卽愈

奇疾方

眉毛動搖目不交睫喚之不應但能飲食有經日不

效者用蒜三兩取汁酒冲服卽愈

孫醫書

麻骨症自頂麻至心窩而死者或自足心麻至膝而
死者用人屎燒灰豆腐漿調飲卽止

萬病回春

氣奔怪病人忽滿身皮底混混如波浪聲癢不可忍
抓之血出不能解謂之氣奔用苦杖人參青鹽細
辛各一兩作一服水煎一大碗細飲之服盡便愈
經驗方

脉溢乃毛竅血出若血不出皮脹如膨須臾眼耳口
鼻被氣脹合此名脉溢飲生薑汁水各一盞卽安
奇方試驗

大腸重行行坐不得用鶴虱灰水調五錢服之自愈
奇症單方

惡肉毒瘡一女子年十四腕軟處生物如莖半在肉
中紅紫色痛甚方士用水銀四兩白紙二張揉熟
蘸擦之三日自落

李樓怪證方

昔一士兩足不癢不痛每行動絕不聽其所用或扭
於左而又墜於右或扭於右而又墜於左之玄而
行不能一步步正走孫文垣以爲由筋軟不能束
骨所致用人參黃芪白芍以補肺金苡仁虎骨龜
版杜仲以壯筋骨以鐵華粉專制肝木煉蜜爲丸
早晚服之竟愈

三吳治驗

咽喉生肉層層相疊漸漸腫起不痛多日乃有竅臭
氣自出遂退飲食用臭橘皮煎湯連服愈

外科方

附刊寒門秘法

寒門五法

一曰發

發則重解肌者爲表之表藥用辛甘言腠理緻密

非辛甘不能開發故曰發發者發正表也

寒傷營無汗麻

黃湯風傷衛有汗桂枝湯

二曰解

解則輕於發爲表之輕藥用辛涼言腠理將疎惡

寒已罷邪將化而爲熱但表病裡和非辛不能散
表非涼不能解熱故曰解解肌肉也

升麻葛根
湯主之

三曰和

和又輕於解表將罷藥用辛者少涼者重言邪將
入腑而未深入腑曰表不可曰裏不可發與解俱
難施於表裏之中故曰和和者和其半表半裏也

小柴胡
湯主之

四曰攻

攻則重於和爲表已罷邪氣入腑藥用苦寒言邪

自三陽經入結於腸胃非苦寒不能攻故曰攻攻

其實熱也

承氣湯主之

五曰救

救則與攻大異熱則攻寒則救藥有溫熱言邪不

由陽經而入竟中三陰名曰直中內寒盛極陽氣

已危故曰救救者急救危陽也

寒客中焦理中湯陰症厥逆四逆湯

吐法大意

五法獨不言吐者蓋仲景有汗吐下三法爲皮毛胃

腑而設汗之言邪在皮毛吐之言邪在胃之上脘

下之言邪在胃腑凝結今人以吐法用在半表半裏所害匪淺蓋少陽膽經汗吐下三法皆禁悞吐之遂變爲壞症則吐不施於半表半裏明矣若胃上脘痰涎胸痞者方敢議吐

實邪以瓜蒂赤小豆吐之虛煩以梔子淡

豆豉吐之虛痰以人參蘆吐之風痰以皂角白礬吐之乾霍亂以燒鹽熱童便吐之

陽經分經腑

三陽在經者可汗凡言經者皆邪舍於皮毛經行皮毛之裏肉之外邪客於經有太陽陽明少陽之分可發可解可和皆邪之在經者故仲景云三陽主

病在經則不可下下之爲痞氣爲結胸也三陽已入腑者可下而已凡言腑者皆邪居腸胃腑主泄水穀傳從糟粕邪之入腑有自太陽入腑有自陽明入腑有自少陽入腑可下可清可攻皆邪之入腑者仲景云三陽之病在腑則不可汗汗之爲譫語爲厥竭經腑旣明攻發自不混亂矣

陰經分傳中

邪自陽經次第而入謂之傳經可攻蓋傳經乃邪自外入內爲實爲熱不可用直中溫藥若悞投名曰

動陰血是實其實也邪不由陽經而入者謂之直中可溫言直中者乃邪不由外入爲虛爲寒忌用傳經寒藥若誤投使寒愈盛令重虛其虛矣能明傳中則承氣理中無有不當耳

皮毛肌肉筋骨臟腑論

凡寒之侵人也必先入皮毛而邪在皮毛作何景象發熱如火燎惡寒毛豎鼻塞不汗皮痛不可近席也 在皮毛也正屬太陽表症故曰發表內經云邪在皮毛者汗而發之此之謂也由皮毛傳於

肌肉則邪稍進一步惡寒已去必唇焦熱盛口唇
者肌肉之本也今見唇焦則知肌肉受邪故不言
發表而曰解肌 由肌肉傳於筋骨則邪又進一
步必齒燥自汗蓋齒乃骨之餘熱入筋骨故齒乾
燥肌肉者身之牆垣熱薰於肉致腠理開則自汗
皆熱在筋骨也故用白虎湯 石膏知母甘草粳米
亦有加人參者名人
參白虎湯以瀉骨中之熱耳 由筋骨傳於臟腑邪已
深入外症悉具必惡熱便閉下利黃赤或腹痛時
作極則發狂此乃邪熱深入臟腑不曰泄裏而曰

攻裏 有不從陽經傳來者謂之直中三陰內純
寒而外無陽經之形症必見厥逆清穀囊縮甲青
等症此直中之寒也不曰攻裏而曰救裏由三陽傳明之
熱症亦復有厥逆過肘膝者經云熱深厥亦深熱
微厥亦微此種萬不可誤認為直中三陰之厥逆
妄投四逆

表症曰發表

一脈浮表也

一身痛表也

一發熱表也

一頭痛表也

一惡寒表也

一目舌和表也

一脊項強太陽正表也

一喘與咳嗽表也

一四肢拘急表也

一口不渴大小便如常表也

一脈不出表也

一面慄洒淅表也

上症一見知邪在表必待發表方可攻裏若悞
下必爲痞爲結胸爲懊憹矣

邪傳肌肉曰解肌

一脈尺寸俱長邪在陽明肌肉也

一身熱不惡寒目痛鼻乾邪在肌肉也

一漱水不欲嚥邪在肌肉也

一唇焦邪在陽明肌肉也

上症一見知邪在陽明經不在陽明腑眞勿混

治

邪在半表半裏曰和解

一脈不浮不沉半表半裏也

一嘔吐半表半裏也

一胸中脹滿未經下過半表半裏也

一耳聾脇痛半表半裏也

一舌滑半表半裏也

一往來寒熱半表半裏也

一頭汗盜汗半表半裏也

一口苦目眩半表半裏也

一默默不欲飲食半表半裏也

上症一見知邪在半表半裏此經有三禁惟小柴胡湯加減和解悞用他藥則變壞症

傳經裏症曰攻裏

一脉沉滑有力裏也

一下利清黃水裏也

一小腹滿而脹痛或硬裏也

一譫語或發狂裏也

一發斑裏也

一轉矢氣裏也

一頭痛發熱俱止裏也

一自汗裏也

一小便多裏也

一潮熱裏也

一下利腸垢裏也

一惡熱裏也

一目不得明裏也

一腹痛裏也

一不得眠裏也

一手足心並腋下有汗裏也

一咽乾齒燥裏也

一舌苔黃黑及津液枯涸裏也

一大便閉裏也

上症一見不拘日數遲早卽知傳經裏症下之無疑若誤汗爲斑爛矣

直中寒症曰救裏

一脉沉細無力直中寒也

一背惡寒直中寒也

一嘔吐清涎直中寒也

一四肢厥逆過肘膝直中寒也

一多眠直中寒也

一乾嘔不渴直中寒也

一腹痛綿綿下利清穀直中寒也

一吐蛔直中寒也

一蹠臥直中寒也

一囊縮唇甲青直中寒也

湯陰太全
一惡寒身痛不頭痛不發熱直中寒也

一四肢拘急不發熱直中寒也

一身痛如被杖直中寒也

一小便清長直中寒也

上症一見卽知直中溫之宜亟亟焉

表裏俱見

一頭痛發熱表症若下利清穀裏也寒也屬表裏俱見寒症也

一腹痛口渴甚者裏症或脉浮是表症亦屬表裏俱

見熱症也

一大便閉屬裏症倘微惡寒此乃表未盡亦屬表裏俱見爲熱症也

傳經表裏俱見爲熱爲實宜解表爲主攻裏次之若裏症急者又在活法

直中表裏俱見爲寒爲虛宜救裏爲主發表次之此治表裏俱見之大法也

脉浮

或問脉浮何以是表症曰浮者脉在肉上行也按

之不足如木浮水面經云寸口脉浮主病在表表者外也如邪在裏脉必沉細又焉得浮故一見浮脉屬表症無疑又曰脉浮屬表倘裏症而脉尚浮者治法奈何曰裏症脉浮者表未盡也必先解表而後攻裏仲景云解表不開不可攻裏太陰篇云腹痛脉尚浮者桂枝加大黃結胸症悉具脉浮不可下是裏症固當下今脉浮又不敢攻矣若表已罷便閉譫語脉浮者當從權下之此乃取證不取脉也

身痛

或問身痛何以是表症曰寒則傷榮邪客於人必由皮毛肌肉今邪舍於皮毛肌肉血脉凝滯不行令人身痛若熱在肌肉血脉榮衛週流一身暢於四體焉有身痛之理內經論咳云時感於寒微則爲咳甚則爲痛爲泄鍼經云寒甚則痛熱甚則肉消腫破內經諸痛皆以爲寒未有以熱爲痛者由此論之知痛爲寒明矣故謂凡見身痛屬表無疑宜用辛散令血氣流行而痛自已又曰身痛旣爲

表症在裏症亦有身痛者曷故蓋裏症身痛乃直中裏症非傳經裏症也若傳經裏症則屬熱熱土流行又何得身痛哉夫直中身痛者寒氣襲入臟腑陽已衰危氣血凝滯令人身痛宜急溫之別之何如有頭疼發熱痛如繩縛者表症也無頭疼發熱而痛如被杖者直中也或曰太陽表症亦有身痛不用麻黃而用四逆者何也曰表症悉具脉當浮緊反沉遲無力是中寒也故不可與麻黃而用四逆是病表有虛寒故脉不能浮緊用四逆湯溫

之此乃太陽脉似少陰假脉浮緊正屬太陽表症
又孰敢用四逆乎此取脉不取證也

發熱

或問發熱何以是表症曰寒鬱腠理則閉塞而發
熱翕翕然烙手此熱止在皮膚而內無熱名曰表
病裏和內經諸症亦論凡風寒客入使人毫毛畢
直皮膚閉而爲熱而汗又云體若燔炭汗出而解
又熱病論云人傷於寒則爲熱病若大汗其熱解
矣卽此觀之發熱屬表明甚又曰發熱固屬表倘

發熱便結裏症又急治法從表乎從裏乎曰裏急者當從權下之亦不敢離表藥何也卽以三黃石膏湯論之

三黃石膏芩連栝梔子麻黃淡豉全葛棗細茶煎熱服麤咽表裏三焦熱盛宜

其湯治發狂口渴及發熱症內有麻黃者爲發熱而設也可見裏症雖急亦不敢純用寒涼尚加辛散况尋常發熱有不以爲表者乎又問凡發熱皆在陽經不在陰經仲景云少陰發熱用麻附細辛湯此又何說曰少陰發熱者表裏俱傷惡寒爲直中非傳經少陰也雖名直中今有發熱者亦不得

純爲直中故用麻附細辛令表裏兩解乃發散溫中也若傳經少陰則惡寒而不發熱然表熱與直中少陰熱別之奈何蓋少陰發熱脉必沉遲無力外無頭痛或下利清穀厥逆諸寒症此少陰症似太陽若此症兼頭痛者是表裏俱見爲兩感寒症又何以爲少陰熱乎總之裏症盛急而外發熱者利藥加麻黃少陰發熱溫藥加細辛可見熱屬表症仲景又云三陰無發熱蓋言傳經也

頭痛

或問頭痛何以屬表曰三陽經上至於頭惟太陽經脉最長其痛居多夫三陽俱有頭痛各分其症以別之故一見頭痛卽是表症又曰三陰經無頭痛厥陰何以有頭痛曰三陰至頸而還何得頭痛惟厥陰與督脉會於巔頂部攝諸陽故有頭痛然厥陰頭痛亦不常見必嘔吐涎沫內無熱症乃直中也當溫之傷寒循經傳至厥陰倘頭痛脉浮爲欲愈不愈用小建中湯小建中湯芍藥多桂薑甘草大棗和更加節糖補中臟虛勞腹痛服之瘥

惡寒

或問惡寒何以是表曰人身外爲陽爲表寒屬陰邪今表虛爲寒所乘名曰陰盛陽虛蓋陽不能溫其膚衛於外致令空虛雖居密室亦引衣自蓋謂之惡寒仲景云陰盛陽虛汗之則愈故惡寒屬表假熱在肌膚必裸體煩躁是曰惡熱又焉得爲惡寒乎若見惡寒知寒在肌膚急投甘辛之劑可也又曰裏症亦有惡寒者何故曰裏症惡寒者直中也非傳經裏症也蓋傳經之症其熱已入腑必然

惡熱焉得惡寒直中惡寒者乃寒氣盛極陽微不
溫故厥逆而惡寒別在何處直中惡寒無頭痛發
熱之症爲異經云發熱惡寒發於陽無熱惡寒發
於陰也又問惡寒固屬表倘傳經裏症盛急亦微
惡寒治法如何微惡寒者表未盡也必先解表表
解然後攻裏若裏急權下之此活法也又曰設悞
下而爲結胸令邪在胸而痛盛急微惡寒何法治
之曰結胸爲悞下而成今惡寒是邪未盡而結於
胸必先解表方服陷胸藥若再攻之表邪又結於

胸必不可救故結胸有一毫惡寒不可攻可見惡寒屬表矣

曰舌和

或問曰舌和何以屬表蓋目乃五臟精華所係舌者所以司內因寒熱而變之者若臟腑有熱目必黃赤舌必乾燥黃黑今目舌如常知邪未入臟腑表病裏和專屬於表無疑

脊項強

或問曰脊項強何以見其是表曰太陽經起於目

內皆上抵額角自顛頂下行入項走肩膊由肩脊
至足小指皆太陽經絡部位邪客背脊循脊上下
故脊項強屬太陽表症至於他經各行其道又何
至脊項強哉旣曰項強屬太陽屬表當發汗又言
結胸項強者當下何故曰結胸項強者非真項強
也蓋結胸悞下致表邪入胸胸與項近邪結上焦
觀於項氣不得宣通其首仰不能俯俯則胸痛危
在須臾故結胸項強脹痛者當急下之非太陽經
項強也別之奈何太陽經症其症首能俯仰俯亦

胸中不痛是太陽經項強也若已經下過其首俯而胸痛者結胸項強也

喘

或問喘者何以是表症曰肺主皮毛寒邪外傷必從皮毛而入肺有七葉同氣升降表受寒邪斂束於肺至氣不可上下故發喘也以麻黃湯論之用杏仁者爲肺金而設麻黃所以去皮毛之寒邪皮毛與肺同氣連合所以喘屬表症今久病喘者尚用麻杏況新病乎又曰喘旣屬肺爲表指掌云喘

滿不惡寒者當下而痊何也曰有一等傳經裏症因便閉不通故濁氣壅塞而成喘者此則不出於肺故當下之必察其外症若有一毫表症而喘者勿作裏症治也誤爲裏症而攻之則逆仲景云喘家無裏症當投杏子此言明甚

咳嗽

或曰咳嗽何以屬表曰肺爲五臟華蓋形如覆釜今寒邪客之則葉欽束不能開發故氣上衝經云時感於寒乃爲咳嗽可見咳嗽屬表矣曰裏症亦

有咳嗽否曰裏症雖有欬嗽屬直中而不屬傳經
蓋直中咳嗽者乃寒急上束於肺故咳嗽下利清
穀四肢厥逆外無表症爲異倘兼有表症而咳嗽
者又非直中咳也若云傳經咳嗽則不是夫傳經
屬熱熱主流通其氣出入疾速又寧有咳嗽耶問
曰裏熱無咳嗽人言咳嗽屬火者何也曰咳嗽屬
火者雜症也病有虛實二火火主炎上亦令咳嗽
或先受寒起咳久則變熱亦屬火嗽二者皆久病
也內外無寒症惟咳嗽而已故有新久之別新則

爲傷風爲傷寒久則爲虛火爲實火風寒者散之
虛火者從治之實火者清涼之曰逆治曰從治皆
治雜症咳嗽也至於傷寒一見咳嗽非表卽直中
傳經斷無之

四肢拘急

或問四肢拘急何以是表症曰寒侵皮毛則拘急
經云寒多則筋骨攣痛熱甚則筋弛肉緩故四肢
拘急屬表無疑曰陰經每見拘急者何也曰乃直
中陰經因傷寒拘急何以別之有身熱頭痛者表

症也無身熱頭痛者直中也至於汗吐下後四肢
拘急者此津液內竭血不能潤筋骨宜真武湯真武湯芍朮苓草附子炮來一氣煎咳嗽辛乾並五味下痢去芍乾薑全小便利時茯苓減嘔者去附生薑

口不渴大小便如常

或問口不渴大小便如常何以是表症曰蓋皮毛
肌肉爲表筋骨臟腑爲裏邪在表則內和口不渴
二便如常若裏熱薰灼臟腑必口渴便閉或不利
腸垢而小水短赤拂其常矣

脉不出

或問脉不出胡爲表病也曰夫脉者血之府熱則
血行豈有脉伏之理惟表受寒深脉遂隱伏曰裏
症亦有伏脉何謂也夫裏症伏脉惟直中者有之
乃寒極凝滯不行用四逆湯加猪膽汁治之四逆湯中
薑附草三陰厥逆太陽沉或益若傳經裏症則屬
薑芎參芍枯通陽復脉力堪任熱熱則血行脉何得伏有陽厥熱極脉亦伏者此
又何說熱極脉伏百無一二外或見大熱症脉雖
伏指必溫亦或有痛處痛極故脉伏也至於尋常

脉伏非表症卽直中矣

以上俱表症當發表

凡寸脉俱長

或問尺寸俱長何以知邪在肌肉曰長者泛溢也
過乎本位陽明乃氣血俱多之經邪一傳之薰蒸
肌膚氣血淖溢故脉陰陽俱長耳當用辛涼解表
不可用辛甘正表之藥或云脉長者邪舍陽明肌
肉有投承氣者何也蓋用承氣者乃陽明之腑非陽
明之經也夫陽明腑病當下之其脉長洪有力便閉

譚語等症方敢投承氣若陽明經病其脉長而浮
乃表病裏和又孰敢用承氣乎又云凡病在陽明
不可下又曰陽明當急下之令醫者是非莫辨蓋
仲景所立諸法淺人莫解而叔和以六經各集成
篇致陽經不分經腑陰經不分傳中抑知仲景用
攻者攻陽明之腑不攻陽明之經表者表陽明之
經不表陽明之腑又安得以經爲腑以腑混經乎
目痛鼻乾

或問目痛鼻乾何以是邪在肌肉也余謂目乃陽

明胃腑所居之經絡胃司肌肉邪必由皮毛而入
肌肉目痛鼻乾故云邪在陽明肌肉至於他經則
各行其道何有是症

漱水不欲嚥

或問漱水不欲嚥何爲邪在肌肉曰唇者肌肉之
本今唇焦思漱水是邪在肌肉然不欲嚥者曷故
蓋熱止在肌肉臟腑無熱不過漱水以潤唇耳故
不欲嚥乃表病裏和又曰表症已除遂屬裏症或
亦漱水而不嚥者治法從表乎從裏乎曰旣無表

症裏必有熱熱則消水漱當嚙矣若不嚙者是內
有瘀血也何以辨之外無表症必見小腹硬滿小
便自利大便秘黑者是也宜用桃仁承氣湯攻之
桃仁承氣五般奇甘草硝黃併桂枝
熱結膀胱小腹脹如狂蓄血最相宜

以上俱邪在肌肉當解肌

脉不浮不沉

或問不浮不沉何以是半表半裏症曰浮爲表沉
爲裏今不浮不沉表邪將入腑故脉不浮裏邪尚
未入臟故脉不沉非表非裏知邪在中也屬半表

半裏無疑

嘔吐

或問嘔吐如何是半表半裏曰蓋邪將入裏裏氣
上冲邪正相爭雖出於胃原是少陽部位膽爲清
淨之府毫物不能容納今邪氣相干故令嘔吐屬
半表半裏又有胃熱胃寒之分辨之以口渴與不
渴耳

胸前脹滿

或問胸前脹滿何以是半表半裏也曰身上半屬

陽身下半屬陰胸前乃清陽之分正在半表半裏之間邪至此將入裏而未深入裏今胸滿而腹未滿者乃邪氣非有物也故胸滿在半表半裏之間若腹滿者是有物而非邪氣也但痞氣亦脹滿胸前何以別之曰痞氣因邪在表誤下以致胸脹必問其人曾經下否若經下過卽是痞氣未經下而胸前脹滿者卽半表半裏症

耳聾

或問耳聾何以是半表半裏症曰蓋足少陽膽經

上絡於耳故見耳聾知屬半表半裏也

脇痛

或問脇痛何以爲半表半裏曰蓋足少陽膽經布於脇脇痛故爲半表半裏至於他經或出於巔背或布於面目何得脇痛或云水氣亦令人脇痛曰水氣必作乾嘔心滿咳引脇痛及頭汗出此水氣脇痛非少陽脇痛也若半表半裏脇痛者外必見膽經之症耳

舌滑

或問舌滑何以是半表半裏曰舌司腸胃寒熱之變係矣邪在表則舌和如常在裏則舌乾而各色現出今舌滑尚有津液潤澤但不如常其邪將入腑未入腑非在表非在裏故云屬半表半裏

往來寒熱

或問寒熱往來何以是半表半裏曰夫邪在陰則寒在陽則熱少陽膽經正陰陽交界之所邪至此經致陰陽相爭寒熱相半故寒熱往來屬半表半裏或問曰陽明亦有寒熱往來者何意曰若陽明

經病邪在肌肉則身發熱焉有寒熱往來已傳陽明之腑鬱熱薰蒸結糞在內故寒熱或往或來是陽明之腑非陽明之經當用調胃承氣湯攻之調胃承氣硝黃草甘緩微和將胃保不用朴實傷上焦中焦燥實服之好故云陽明內實則寒熱往來耳

頭汗

或問頭汗爲半表半裏者蓋以諸陽經脈絡上至頭則有汗諸陰經脈絡繫背至頸而還焉得有頭汗故一見頭汗卽屬半表半裏或問曰旣諸陽脈

上至頭今汗出當云表症何以爲半表半裏曰若
表症尚有寒邪閉塞焉能有汗今既有汗是寒邪
將化爲熱名曰裏症則頭有汗名曰表症則頭無
汗故云半表半裏又曰瘀血水氣發黃亦有頭汗
者何也夫瘀血頭汗小便自利水氣頭汗胸滿咳
嘔發黃頭汗小便不利若半表半裏頭汗必往來
寒熱也然三症頭汗皆未離乎陽可見頭汗屬半
表半裏也

盜汗

或問盜汗何爲半表半裏曰夫熱邪薰灼腠理使人有汗寒則腠理閉密無汗是裏當出汗不止今汗在睡而出覺而收乃邪將旺於陰分猶未深入於陰亦屬半表半裏又問曰雜症盜汗亦作半表半裏治乎曰雜症盜汗乃陰虛之極血分虧損名曰勞怯之症今傷寒盜汗乃有餘之邪名曰外感非雜症一例論也

目眩口苦

或問目眩口苦何以是半表半裏曰目者肝之竅

膽汁藏於肝病在少陽膽經故目眩口苦者膽之汁也熱泄膽汁故口苦二者是少陽膽經病半表半裏法宜和解至於他經便無此症

以上俱邪在半表半裏當和解

脉沉有力

或問脉沉有力何以是傳經裏症曰夫脉存則生脉絕則死太過不及則病內實則脉實內虛則脉虛今沉者病脉也主病在裏有力者實也主病爲熱今脉沉有力是裏實且熱也

下利清黃水

或問下利清黃水何爲裏症曰蓋腸胃因久失下致燥糞結實成塊則清黃水下漏魄門如物之聚而結實者水液不能滲漏物堅如磊石者沃之水必滲漏矣今病者下利清黃水糞結如磊石在內此水從結糞傍流走而出急下之無疑往往以直中下利清穀者爲漏底傷寒若悞認此症爲漏底投以四逆如抱薪救火殆哉故云下利清黃水是裏症當急下之

小腹滿

小腹滿者胡爲裏症曰夫胸膈屬清陽之分雖脹滿是邪氣而非有物小腹乃糟粕之區若脹滿非邪氣也故知有物急下之又云瘀血症及溺澁症者亦少腹脹滿何以別之凡小便自利少腹硬滿而痛者此瘀血症也小便不利而少腹脹滿者卽溺澁不通也若小便短赤大便閉結致少腹硬者乃內有燥糞故爾滿也卽瘀血溺澁皆是裏症

譫語發狂

譫語發狂爲裏症者蓋熱實於胃熱極故發狂輕則令人譫語皆是傳經裏症難經曰發狂譫語乃實熱陽盛所使經言有虛有實何也曰驚狂屬虛或當汗不得汗火迫致狂名曰火邪驚狂當用柴胡龍骨牡蠣之類非若實熱發狂可下也

發斑

或問發斑亦裏症耶曰斑有溫毒有熱毒有胃爛溫毒者卽冬受寒至春陽與陰氣相搏而發者是也熱毒者是暑氣伏胃因遇寒而發者是也胃爛

者或誤下而熱乘虛入胃或失下而熱不得外泄
毒氣入胃深極也故斑者毒也毒者垂戾失常偏
陰偏陽之至也外因六氣相感胃有熱毒薰蒸胃
主肌肉熱甚傷血裏實表虛故令周匝遍體狀如
蚊螫紅赤者生紫黑者死以熱極而胃爛也舌苔
唇裂者不治治當解毒清涼不可表藥取汗蓋表
虛裏實發汗則益令開泄更增斑爛矣又問陰症
亦有發斑者何也曰或因汗吐下後中氣虛乏或
因慾事耗損真陽或因過服涼藥遂成陰症寒伏

於下逼其無根失守之火上薰肺胃而發斑點其
色淡紅隱隱見於肌表與陽症發斑色紫赤者不
同此胃氣極虛若服寒藥立見危殆吳鶴臯曰以
參芪桂附而治斑法之變也醫不達權安足語此
又問曰內傷亦有發斑者何也曰內傷元氣不足
之病因氣血兩虛亦身痛心煩作熱但脉虛大懶
於言動倦怠自汗爲異耳若妄作外感有餘治立
見傾危速進補中益氣湯熟眠熱止自愈丹溪曰
內傷發斑者胃氣極虛一身之火遊行於外宜補

以降之大建中湯最佳

參芪歸芍炙草半夏桂附加薑棗水煎服若內

有伏陰誤服涼藥逼其虛湯浮散於外而爲陰斑
脉雖洪大按之無力或手足逆冷過肘膝者先用
炮薑理中湯以復其陽次隨症治不應加附子

轉失氣

或問轉失氣何以是裏症曰言其氣下泄也觀無
病人將欲大便必先氣泄病者內有燥糞結而不
通則氣必下失陽明篇云若不轉失氣者不可投
承氣湯是知轉失氣屬裏矣

頭痛發熱俱止

頭痛發熱俱止是裏也邪之初中始於太陽太陽
爲表之表頭痛發熱俱多少陽陽明爲表之中亦
頭痛發熱若邪入裏必表症盡除焉得頭痛發熱
乎

自汗

自汗何爲裏症經云寒則腠理閉塞熱則腠理開
踈太陽始受寒邪未化爲熱腠理緻密無汗當用
麻黃湯始無汗忽變爲有汗者知熱已入腑薰蒸

鼎沸故自汗爲裏症假寒在表焉有汗乎或問自汗爲裏有用桂枝湯又曷故蓋自汗用桂枝湯者乃太陽傷風症夫裏症自汗爲陽盛孰敢用桂枝仲景去桂枝下咽陽盛則斃別之奈何淅淅然惡風頭痛發熱惡寒者太陽傷風自汗也煩躁惡熱不惡風寒者裏症自汗也

小便多

或問小便多者何爲裏症曰蓋飲食入胃由胃傳於小腸經曰小腸者受盛之官胃司水穀清濁不

分一槩混受由小腸而下則有膀胱與大腸清者
從溺滲入膀胱糟粕從胃之下口傳於大腸膀胱
竅閉水入大腸必作泄瀉若大便堅閉津液走前
則小便頻數今小便多者大便閉結故症屬裏也
小便若少大便雖閉水液不久浸入大腸當先鞭
滿而後溏泄矣仲景云小便少者不可攻以其不
久當自便也

潮熱

或問潮熱何以是裏症曰潮熱者如潮水之汛不

失其期如今日發於未申至明日仍發於未申蓋
未申時屬陰今見潮熱是邪居陰分熱結在裏薰
灼結糞當下之又問曰潮熱屬裏固當下猶有表
症何以治之曰已有潮熱倘兼表症未退必先解
表然後攻裏乃爲當耳

下利腸垢

或問下利何以是裏曰下利出於腸胃若表有邪
則裏和焉得下利因邪入腑熱灼腸胃致有此症
又曰表症亦下利否曰三陽合病則有下利或少

陽陽明合病陽明者內主胃腑故有下利三陽合
病若不入腑又無下利何者爲辨但有發熱及諸
表症耳下利固爲裏症又當分傳中傳經則腸垢
直中則清穀二者下利以腸垢清穀爲異

惡熱

或問惡熱何以是裏症曰熱傳臟腑薰蒸煩冤揭
去衣被揚手露體此熱傳裏也若有寒在內則惡
寒焉有惡熱之理

目不明

或疑目不明以爲裏者何解曰目係五臟精華五臟屬陰陰居於裏故云在裏况瞳人屬腎內熱灼極則腎水枯涸不能照物譬之炎天熱甚致目昏蔽當速下之以救腎家將絕之水設謂此症屬虛誤投熱藥害豈淺鮮哉

腹痛

或問腹痛何以屬裏曰嘗考坤爲腹乃純陰也謂之曰陰則腹痛非表明甚若腹未痛而胸前痛者邪未深入尚作半表半裏症今腹痛知邪已傳腑

矣曰既腹痛屬裏當投大黃又用桂枝者何意曰
或太陽症誤下致腹痛尚有微表未解或太陰裏
症而脈帶浮者故用桂枝大黃令表裏兩解然腹
痛雖屬裏又有傳經直中之分須慎之

不眠

或問不眠何以見裏症曰蓋熱邪入腑令人煩躁
不安若寒盛爲直中則屬陰陰主靜靜則多眠又
豈能不眠又問不得眠固屬傳經裏症有投寒藥
愈盛者何故此乃汗吐下後症也名曰津液內竭

不得眠必心蘊虛煩脉未浮弱也 當用真武湯及
酸棗仁湯而裏症不眠者則煩燥口渴不已脉必
有力故知之

手足心腋下出汗

手足心及腋下出汗爲裏症者蓋人身諸背屬陽
諸腹屬陰手足掌心腋下皆居陰地五臟經絡所
係熱邪薰蒸臟腑致掌中腋下汗出若掌中腋下
未滋潤者邪尚在表未入裏即謂之表病裏和今
掌心腋下出汗知大便已鞭皆急下之爲裏症無

疑

咽乾齒燥

或問咽乾齒燥何以屬裏曰夫咽爲胃之路齒乃骨之餘今咽乾者腑熱盛也齒燥者熱灼骨也骨與胃非裏乎或問曰內熱甚當咽痛寒症亦咽痛何也蓋直中之寒爲咽痛必下利清穀四肢厥逆此乃寒極而成反致咽痛與之水則不欲嚥不若傳經咽乾齒燥極喜飲水耳

以上俱傳經裏症當攻裏

脉沉細無力

或問脉沉細無力何以是直中寒症曰蓋元氣固於一身暢於四肢熱則脉數寒則脉遲定理也沉者陰也無力者虛也是寒中陰經陽氣衰微故脉不能有力假內有熱脉必實而且滑安得無力若脉無力卽爲寒爲虛爲直中耳外雖有表症或大熱之症不敢用攻裏及發表藥若不憑脉而槩投麻黃令重虛其虛欲救晚矣

背惡寒

或問背惡寒如何是直中曰陰邪入於陽分陰盛陽衰當用附子理中湯或曰陽明腑病背亦惡寒何也曰夫陽明腑病背惡寒者外無寒症必見口渴煩躁背屬陽陽熱內陷入腑則背空虛致微惡寒故用白虎湯若口中和者正屬直中寒症又孰敢用白虎耶總之渴則內有熱不渴則內有寒也嘔吐清涎沫

或問嘔吐涎沫何以爲直中曰胃腑有寒熱必先現涎沫內經云諸嘔吐酸水及水液渾濁者皆屬

於熱諸病吐涎及澄澈清冷者皆屬於寒如天寒則水清天熱則水濁之意若有熱有火在胃脘之間自燒耗津液以致口渴化爲酸濁之水又安得有清涎沫乎

四肢厥逆

或問四肢厥逆何爲直中寒症曰蓋四肢屬陽寒邪屬陰陽衰陰盛故發厥過乎肘膝况肘膝乃人之四關今寒過之是爲直中脉沉遲無力者急溫之或問又有陽厥者何也此物極則反雖厥指甲

尚溫不似寒厥冷極外症必口渴煩躁惡熱小便
短赤大便或閉或下利腸垢脉必沉實有力但有
一症卽以爲別

多眠

或問多眠何以屬直中曰陰盛則靜靜則使人多
眠若傳經熱症則屬陽陽主動焉得多眠又云表
症亦有多眠者何說曰表症是感邪深重必頭痛
發熱方爲表症多眠若傳經裏症則煩躁惡熱揭
去衣被甚則譫語發狂又何能多眠耶總之多眠

非直中寒症卽是表症矣

乾嘔

或問乾嘔何以是陰寒症曰蓋寒搏中脘陽氣不舒欲吐不吐名曰乾嘔若有熱在內則吐出物或嘔酸苦水便無此症或謂太陽少陽水氣亦令人乾嘔何也曰太陽乾嘔頭痛發熱少陽乾嘔胸滿脇痛水氣乾嘔咳引脇下痛惟直中乾嘔則外無一毫表症必見下利清穀而慘洒淅及諸寒症然太陽少陽水氣三者乾嘔究未離乎寒也

下利清穀

或問下利清穀何以是直中寒症夫寒邪居內則水穀不化經云食下卽化腐臭而出者是有火也食下不化完穀而出者是有寒也又云天寒則水清天熱則水濁病機云諸水液澄徹清冷者皆屬乎寒今下利清穀非寒而何若傳經熱症便下利腸垢而不下利清穀矣

吐蛔

或問吐蛔何爲直中曰蛔得熱則安遇寒則泛吐

蛔必膈上有寒也投之涼藥則逆當急溫之又問
曰倘外大熱症而吐蛔亦禁用寒涼藥否曰如烏
梅理中丸係安蛔藥也皆用附子乾姜雖有熱症
必先安蛔而後可治他症不然膈上虛寒犯之必
危

踈臥

或問踈臥何爲直中曰熱則舒暢流通何有踈臥
試觀常人冬月獨臥寒極必踈臥天氣稍煖則手
足伸舒臥便自如曰陽經表症亦有踈臥者寒耶

熱耶曰陽經踈臥表中寒深故也須大發表分別
在有頭痛發熱及諸表症乃是陽經踈臥蓋陰經
踈臥則無一毫表症

囊縮

或問囊縮何以屬直中者曰蓋熱主流通寒則歛
縮且直中寒症乃陰盛陽衰不能溫其下故令陰
囊收縮如常人遇冬舉丸反隱於上此寒盛也遇
夏舉丸下垂此陽盛也然指掌以囊縮用承氣者
何意曰厥陰者肝也肝主筋膜若次第傳至厥陰

六經已盡邪氣盛者致筋急舌卷如中風狀而囊
爲之歛搐以筋聚於陰器故也非似直中曰隱曰
縮夫指掌以囊縮當下者必口渴煩滿極方敢投
承氣至於口不渴兼有一毫厥逆清穀悞投承氣
必危

唇甲青

或問唇甲青何以是寒症曰蓋指得血而能握唇
得血而色赤今寒中之血凝不能濡潤唇甲色變
況色之赤者爲熱青者爲寒急溫無疑或曰陽厥

亦唇甲青別之如何曰陽厥熱深也熱極反厥然
唇甲似青實非青也乃紫黑色唇雖紫口必渴與
之水則飲飲後唇視之咽喉如煤指甲雖紫尚溫若
直中者唇青而口和甲青而厥逆寒熱之辨相隔
千里司命者凜之毋忽

小便清長

或問小便清長何爲內有寒乎曰夫內熱則便赤
短少內寒則便清且長或曰邪在皮毛未入腑者
亦便清長何以別之曰邪在表爲表病裏和言便

如常今謂之曰清長則異於常時耳要知直中小便清長必見厥逆清穀外無表症爲異若有頭痛發熱而小便清長如舊者則又屬表矣

以上俱直中寒症當救裏

似症辨疑

少陰似太陽

有少陰直中發熱似太陽發熱何以辨之曰蓋太陽發熱必有頭痛脉浮而緊宜麻黃湯少陰屬裏寒不當發熱今發熱何也乃表裏俱傷惟表有寒

故發熱雖發熱脉必沉遲或下利清穀當用麻黃
細辛以發表附子以溫中令表裏寒邪兩解若有
頭痛發熱而脉重緊卽是太陽表症又何以爲少
陰熱乎經云陰症少頭痛設有頭痛發熱兼之下
利清穀卽是兩感於寒而非少陰熱矣

陽明經症似腑症

有陽明經症誤作陽明腑症者如何辨蓋陽明經
病表病裏和也陽明腑病裏病表和也經腑同見
者表裏俱病也經則目痛鼻乾無便閉譫語惡熱

等症此不可下腑則惡熱自汗便結無頭痛惡風
惡寒此不可汗然汗解者汗陽明之經而不汗陽
明之腑下者下陽明之腑而非下陽明之經也
表症自汗似裏症自汗

有表汗認爲裏汗何以別之蓋表病自汗太陽傷
風也裏病自汗熱邪傳腑也風者善行數變性主
舒暢萬物人身腠理開故自汗必惡風頭痛發熱
其脉浮而緩若裏症自汗因熱傳腑熏蒸鼎沸亦
腠理開而自汗惡熱甚外無大表症其脉洪而有

方一惡風脉浮而緩一惡熱脉洪有力須細察之
表症身痛似直中身痛

表症身痛似直中身痛從何分別蓋表症身痛太
陽傷寒也裏症身痛寒邪經中三陰也名曰表則
頭痛發熱名曰陰又何有頭痛發熱表症身痛者
重表之直中身痛者重溫之皆寒爲病以寒主凝
滯血脉故令人身痛若熱則無身痛症

如狂似正狂

如狂未若正狂之甚陽熱盛極令人發狂其症大

便閉結小便短赤面紅口乾經曰重陽者狂此之
謂癲若如狂乃蓄血下焦少便自利唇焦漱水不
欲嚥當用桃仁承氣湯一小便短少而狂甚一小
便自利而糞黑爲別

動陰血似衄血症

動陰血與鼻衄何以異蓋衄從鼻孔中流出若動
陰血則不止在鼻乃少陰傳經裏症熱極而反厥
逆者是誤用麻附以熱症而用熱藥使內熱愈甚
迫血妄行故從耳目口鼻中流滴名曰動陰血非

衄血也

表惡寒似裏惡寒

表惡寒不同裏惡寒者直中裏症惡寒外無一毫
身熱頭痛若表症惡寒必有發熱頭痛之異經曰
發熱惡寒者發於陽無熱惡寒者發於陰此乃千
古確論

陰躁似陽躁

有陰極反煩躁似陽躁者何法辨之蓋熱極煩躁
必口渴飲水能嚥或大便閉或下利腸垢腹中急

痛若直中陰寒反躁者乃物極則反口雖渴欲水
不下嚔大槩以脉消息之耳辨其有力無力脉稍
有力而能嚔水者卽是陽躁非陰躁也

瘀血發黃似鬱熱發黃

瘀血發黃與鬱熱發黃何以別之蓋當汗失汗致
熱邪傳裏薰灼肌肉熱弗能升越令人發黃則小
便不利若膀胱熱不解瘀血蓄於下焦而發黃則
小腹硬痛而小便自利二症發黃惟視小便利與
不利耳

熱厥似寒厥

寒熱之厥辨在何處蓋寒厥四肢逆冷過乎肘膝
指甲青脉沉細無力有寒症見於外若熱極而厥
者火極似水雖厥而指甲尚溫不似寒厥過乎肘
膝脉來沉實大而有力以此爲別

直中咽痛似傳經咽痛

直中傳經皆有咽痛不知傳經咽痛必口渴渴能
消水大便閉不閉則下利腸垢小便短赤若直中
咽痛則脉來無力或下利清穀口不渴而咽痛者

名曰腎傷寒急用半夏桂甘湯若見口燥渴卽傳經咽痛宜用苦寒之劑二者總在渴與不渴消水不消水辨焉

太陽無脉似陰脉

太陽無脉

卽脉不出也

認作陽症見陰脉者不可也蓋

太陽無脉因寒邪在肌膚凝滯不行血脉難以週流故無脉乃表感寒邪深重外必見太陽症方是當大發表以通血脉豈得混作陽症見陰脉乎

太陽脉似少陰

有太陽脉似少陰別之奈何在外絕是太陽表症
頭痛發熱惡寒身痛脉當浮緊今反沉遲無力此
脉不取是太陽表症得少陰脉此裏虛久寒正氣
症也衰弱故脉不能浮緊而見沉細若正氣旺脉必浮
緊何至沉遲無力故用四逆湯使正氣旺通寒外
出脉遂自然浮緊設誤投麻黃發表是重虛其虛
矣

太陽腑症似裏症

太陽腑症與裏症有辨蓋太陽腑者膀胱也膀胱

所以盛溺若溺短赤卽太陽腑病悞以溺赤爲裏
症者非太陽始受病必頭痛發熱甚則邪傳於本
腑遂便赤此邪止在太陽經腑其他臟腑平和無
恙勿作裏症治當兩解太陽經腑之邪發散中加
滲利藥如五苓散五苓散治太陽腑白朮澤瀉猪
茯苓膀胱氣化添官桂利便消
暑煩渴清除桂名爲四苓散無寒但渴服之靈卽太陽腑藥也今人見病
起有表症兼溺赤卽不敢用發散然果是裏症而
小便短赤無一毫表症清利無妨若溺赤而兼有
表症外無胃腑症者此是太陽經腑相表裏

表又何疑焉

津液內竭誤利小便

有津液內竭小便不利而失錯利之過矣蓋人身之汗與溺同源經云天寒衣厚則爲氣爲溺天熱衣薄則爲汗言寒則溺多而汗少熱則汗多而溺少陽明腑病汗多小便不利者皆津液內竭妄利之重虛其虛而便愈不利矣果是裏症熱在下焦及未曾大汗而小便不利者方用滲利之品若一見自汗或大汗後小便不利者乃津液內竭切勿

輕利也

兩感須分傳中

兩感者陰陽雙傳也表裏並行如膀胱與腎脾與胃肝與膽俱傷若與他經同見卽爲合病或表裏俱見遂非兩感矣如活人書宜先救裏以四逆湯以六書言不可救以攻爲主二者偏見非活法也果見下利清穀必先救裏果見煩滿口乾則先攻裏大法傳經兩感先治表直中兩感先救裏或救或攻以治其急爲上

於陰經中分寒熱於裏症內別虛實故知屬於傳中不可

拘傳中二字不然既兩感何得又試以直中兩感傳中既傳中又何得謂之兩感耶

論外症頭痛發熱脊項強痛者太陽表症也下利

清穀脉來沉遲無力少陰寒症也表急者麻黃湯

爲主加溫熱之品如麻附細辛湯是也裏急者以四逆湯爲

主加發表藥今表裏兩解表裏俱急則先治其一

若表盛於外而熱盛於內名曰傳經兩感外症頭

痛發熱太陽也咽乾口渴腹滿少陰也如是只以

解表爲主加辛涼藥如口渴腹脹滿裏症急者方

敢攻裏必加辛涼解表何也凡傳經不與直中同

看直中寒邪徑入陰經五臟已危必先救裏傳經
自表入裏若裏症不急有一毫表症必先解表而
後攻裏內經所謂逐邪必絕其源者是也如陽明
與太陰俱盛於外頭疼目痛發熱陽明也腹脹自
利口渴太陰也陽明經病在者宜解肌爲主加涼
藥治裏陽明腑病同見者調胃承氣湯下之如少
陽與厥陰症俱盛於外耳聾口苦發熱少陽也口
渴囊縮厥陰也少陽症急以小柴胡湯主之加以
涼藥治裏厥陰消渴囊縮者則以承氣爲主加柴

胡牛夏治表噫兩感因爲不救司命者能操活法
或可冀生總之兩感之寒宜先救裏兩感之熱宜
先解表此治兩感之大法亦治兩感之活法也
合病併病

夫合病者用也或二陽形症俱見或三陽形症俱
見謂之曰合併者歸也先二陽形症俱病後一陽
病裏一陽形病在外方謂之曰併其合病併病形
症辨在何處合病如外見脊腰疼痛及耳聾脇痛
乃太陽與少陽合病也外見耳聾脇痛及目痛鼻

乾乃少陽與陽明合病也如此方謂之合併病如
外先見腰脊強及耳聾脇痛後耳聾脇痛止單腰
脊項强者此少陽併於太陽也外先見耳聾脇痛
後目痛鼻乾鼻乾止而單耳聾脇痛者此陽明併
於少陽也外先見目痛鼻乾及腰脊項強後腰脊
項強已而單目痛鼻乾此太陽併於陽明也如此
方謂併病又曰一經不徹復過一經亦名併病蓋
陽主動動則合合則併陰主靜靜則無合併之理
假如與陰經同見或兩感或爲表裏俱見則不爲

合病併病矣仲景云三陽有合病有併病陰經既無合併治法當從表不從裏明矣三陽合病以解表發表爲主看某一經形症多者則以某一經藥爲主加他經藥在內此治合病之大法也若併病看併於何經併於太陽則發表併於陽明經則解肌併於腑則下之併於少陽則和解此治併病之大法也然而三陽合間有下者何也蓋三陽合病宜下外無惡寒必惡熱譫語已合陽明之腑方可用調胃承氣湯若有一毫惡寒不見惡熱譫語孰

敢下乎

熱入血室

傷寒有熱入血室一症晝則明了夜則譫語如見鬼狀醫誤認爲裏隨大下之或昏冒終日不知人事又誤爲表隨大汗之邪在血脈或誤攻裏或誤發表必至不救試思何以爲血何以爲熱人身之血譬如江河周流不息隨氣而轉在於脈中內經云諸血皆屬於脈又曰脈者血之府夫熱者邪氣也婦人傷於寒邪必不免於病熱或病中經水適

來或已病經水忽絕經去血空熱邪乘虛陷入蓋
血之源在心心爲血本又主藏神今熱邪入於血
室使人昏冒譫語治惟母犯表裏母傷胃氣只有
小柴胡一湯和解或用地黃湯倘誤用他藥令重
虛其虛斃而後已不則聽其自愈以經行則熱隨
血去倘經來適斷者症如瘧狀其血必結結者血
滯不行用小柴胡湯加紅花主之若誤認熱入血
室爲表爲裏則死生在乎須臾危哉

胎前傷寒

蓋胎賴血養血去則胎不能存孕婦設受寒邪大
汗則傷血大下則傷陰皆能動胎內經曰奪汗者
無血如發汗攻裏必先安胎爲主外有表邪用四
物湯爲主倍加黃芩白朮佐以蘇葉乾葛羌活柴
胡卽孕婦表藥也外有半表半裏症用小柴胡湯
去半夏倍加黃芩白朮卽孕婦和解藥也內有裏
症用四物湯加黃芩白朮佐以大黃厚樸枳實卽
孕婦攻裏藥也假若症候危急非毒藥不能攻又
當救母不救子設拘執救胎則母亦不可救矣內

經云婦人身重毒如之何岐伯曰有故無殞者亦
無殞者大積大聚衰其大半而止言有故母有故
也上無殞者無損母也卽救其已生不救其未生
亦無殞者言子亦無損蓋言毒藥止攻邪氣邪去
病愈則子亦安故言不損也言衰其大半而止者
假如發表汗一半則止不可過汗其大下一半
則止不可過下恐多汗過下有傷陰血胎氣亦損
治孕婦用藥之難如此

產後久病傷寒

夫產後血氣太虛久病氣血必弱二者設感寒邪

治不與正傷寒同產後氣血虧以致惡寒發熱

必虛弱無力非傷寒也當大補氣血用小柴胡湯

加減在裏用大柴胡湯加甘草大柴胡湯用大黃枳實芍藥

煎加薑棗表兼裏妙法內攻併外攘若虛弱甚而裏症急者用大柴

胡湯加人參固下蓋參能補肺氣肺與大腸相為

表裏用參以助藥力雖行而不傷其氣血此產後

傷寒用藥之法也若久病虛疾亦惡寒發熱與傷

寒相似慎勿作傷寒治虛疾惡寒發作有時鼻口

息均脉虛無力非正傷寒也若脉來者力畏熱惡寒無有間時鼻息氣盛方是外感久病之中又感

寒邪若表症則用參蘇飲參蘇飲內用陳皮枳殼前胡

外感此或人參敗毒飲羌活獨活柴胡前胡人參以表

之不可大用燥熱辛甘之劑愈耗津液若在半

表半裏以小柴胡湯去半夏加減和之蓋半有能

燥津液故去之若邪在裏用調胃承氣湯去

芒硝加減用之慎勿用寒涼以傷胃氣胃氣一傷

飲食便廢矣此治久病感寒之大法也天久病虛

後但傷其寒者不可大發表大攻裏發表則重虛其陽攻裏則重虛其陰必致六亡產後久病固不宜大汗大下設病勢危篤又當從權也

感冒

感冒者非冬時正傷寒也今人不分感冒與正傷寒一槩混治者多矣蓋冬中殺厲之氣名正傷寒春夏秋則為溫為暑為涼何得有寒間有非時寒邪人或感之曰名感冒溫既曰感冒則所病非輕亦不得用冬時正傷寒辛甘辛溫之藥當用微辛涼

以解之

如此原蘇衛葛
卷之三

况人春夏皮膚緩而腠理疎

則邪易入或勞力汗出而遇微寒或自外卸衣或

畏暑貪負涼或大時暴寒皆能傷之其症身寒清涕

咳嗽頭痛身微發熱微惡寒此感冒症也又何得

謂之傷寒哉或曰夏天既無寒間有陰症而用四

逆湯何也曰夏月三陰在內用事此人必有房事

致腎經空虛或食冷物徑中本經而成此症是者

陰經所過之處或是履寒水徑中本經之絡而成

此症則不謂夏月有寒此自傷之也亦急溫之此

夏月腎虛中寒之症除此則為中暑為熱病
所以春夏只有溫暑間有微寒人或感之則
名為感冒不得律為正傷寒矣